

## XX ғасырдың алғашқы жартысындағы қазақ әдебиетіндегі әдеби үрдіс пен жаңашылдық

Сырайым Ысқақұлы

**Қысқаша мазмұны:** XX ғасырдың бірінші жартысындағы еліміз қазақ әдебиетіндегі әдеби үрдістің негізін қалаған ақындар шығармашылығындағы ынғайластық және үндестік мәселелері талданып, олардың бір бағытта, бір мақсатта қалам тартып, ақындық үрдістің дамуына қосқан үлестері сараланады.

**Түйін сөзі:** Әдеби үрдіс, ағартушылық идея, әлеуметтік сарын XX ғасырдың бірінші жартысы қазақ халқының мәдени-әлеуметтік өмірінде әбден шиеленіскен кезі еді. Қоғамдық жүйелердің ауысу-арбасуы рухани дүниеге қатты әсер етті. Аталмыш кезең әдебиетінің өзіне дейінгі ұлттық әдебиетпен сабақтастығы, жалғастығы болды, сонымен қатар шығармашылығы тұрғысынан елеулі ерекшелігі, атаулы айырмасы да жетерлік еді. Осы тұста халық әдебиеті үлгілері көп басылды, баспасөз дами бастады. Әдеби өмірде жазбаша әдеби сын да қалыптасты. Мұның бәрі әдеби-мәдени өмірдің оқиғалары болса, әдебиеттің ішкі мазмұнында, сыртқы пішінінде өзгеру, жаңару үрдістері де байқалды. Абай поэзиясындағы реалистік дәстүрдің ықпалы да аз болмады. Оған қоса діни-ағартушылық әдебиеттің сарындары да әсер етті. Нәзирашылдық да дамыды. Кейбір нұсқалардан зар заман әдебиетінің сілемдері айқын аңғарылды. Ескіше оқыған-тоқығаны мол, жаңаша сауатты әдеби орта қалыптасты. Мемлекетіміздің тарихи-мәдени салада болып жатқан өзгерістердің де әсер-ықпалы зор болды.

Жалпы бір дәуірде өмір сүріп, белгілі бір қоғамдық-әлеуметтік жағдайды басынан өткерген ақындық ортада да ұқсастық, жалғастық басым болады. Ой-арман бірлігі, көзқарастарындағы ынтымақтастық, белгілі жанрлардағы қолдасу, тақырыптар арнасының бағыттастығы, күрескерлік рух, халықшылдық, қоғамға қарсы кекесін мен мысқылдың жауынгерлік сипатпен астасуы сияқты қадір-қасиеттер қазақ әдебиетінде де ерекше дамып, дәстүрлі орта мен ақындық үрдістің негізін қалады. Оның өкілдері өзіне дейінгі әдебиеттің асылын, үлгісін ала отырып, дәуірге сай жаңа көркемдік мүмкіндіктерін ашты. Өмірді суреттеу сан алуан болғанымен, бәрін біріктірген ортақ ұлы мақсат өз халқының санасын ояту, еркіндік-теңдікке қол жеткізу еді. Бірақ болжалды идеяның бірыңғай күйде көрініс тапшасы белгілі, өйткені әрбір ақынның көркемдік шеңбер шегі, ізденіс бағыты бар екенін есте ұстау қажет. Аталмыш ортада күні озған әдет-ғұрыптар мен қоғамдық өмір әкелген кесапаттарға қарсы күрес нақты көрініс тапты. Олар әлеуметтік теңсіздікті, адам өмірінің табанға тапталуын көзбен көріп, іштей сезініп өскендер болатын. Азатшылдық рух рухани жаңғыру мен түлеудің ой-сана оянудың басты жаршысы болды.

Алғы тарихы қазақ халқының өнерімен өзектес, желілес XX ғасырдың алғашқы жартысындағы Қытай қазақтарының жазба әдебиетінде поэзия

жетекші жанр болып, бірімен-бірі ілесе, қатарласа шығып, бір бағытта, бір мақсатта қалам тартып, әдеби орта қалыптастырған Ақыт Үлімжіұлы, Таңжарық Жолдыұлы, Көдек Маралбайұлы, Асылхан Мынжасарұлы, Шарғын Әлғазыұлы, Шылбы Көмекұлы, Досбер Сауырықұлы, т.б. ақындар белгілі бола бастады. Бұлар өз дәуіріндегі қоғамдық өмірді өздерінше шолып, өздерінше толғады. Өз заманының шындығын шығармаларына арқау етті. Қалың қауым халықтың мұңын мұңдап, жоғын жоқтады. Ұлт-халық тағдырын, заман-дәуір келбетін сөз етті.

Әдеби үрдіс өзгеру, түлеу, жаңғыру, жалғасу, жаңару, даму сияқты ұғымдармен байланысты, осыған орай жалпының жалқыға, жалқының жалпыға тигізер әсер-ықпалы болатыны анық. Осы тұрғыдан келгенде, жоғарыдағы ақындардың тағылым алар, тағылым берер ықпалдастық райдағы ақындық ортасын бірлікте, тұтастықта қарастыру ХХ ғасыр басындағы Қытайдағы қазақ поэзиясындағы әдеби үрдісті және ондағы жетекші әдеби күштерді айқын тануға мүмкіндік береді.

Осы ретте жоғарыда аттары аталған ақындар шығармашылығындағы ыңғайластық, үндестік негізінен **ағартушылық идеяның дамуы мен әлеуметтік сарынның көрінуі** бағыттарында тоғысады. Ағартушылық идея да, әлеуметтік сарынның көрінуі де барлық ақынның шығармашылығына тән болғанымен, олардың бір тобы ағартушылық бағытта басымырақ қалам тербесе, екіншілері әлеуметтік мәселені көбірек қозғаған өлеңдер жазды. Бұл орайда Шылбы, Шарғын, Досбер сынды ақындар ағартушылық идеяның дамуына барынша үлес қосып, басымдылық танытса, Асылхан, Көдектердің шығармаларында әлеуметтік сарын молынан көрінеді. Ал Ақыт, Таңжарық шығармаларында бұл айтылған мәселелердің қай-қайсысы да толығымен көрініп, дамытыла, жетілдіріле түседі. Әрине, шығармалары талданып отырған ақындар тек осы шеңбер аясында ғана өлең тудырды деген түсінік болмау керек. Біздің бөліп қарап отырғанымыз – белгілі кезең әсерінде туған әдебиетті жүйелеп көрсету мақсатындағы айтылған ой. Әйтпесе бұл ақындар азды-көпті болса да алуан түрлі тақырыпта қалам тартқаны шындық.

Ағартушылық идеяның дамуын айқындайтын шығармалар беру тұрғысынан келгенде, көп басында Ақыт Үлімжіұлы (1868–1940) тұрары анық. Міне, осы бір кезеңде, бір өлкеде өмір кешкен ақындардың басқы буынында тұрған ағартушы ақын, халықшыл қайраткер Ақыт Үлімжіұлы өзінің түрлі әлеуметтік мәселелерді қозғайтын, алуан тақырыпқа жазған туындыларының ішінде ағартушылық, сонымен қатар діни-ағартушылық идеяларды сабақтастыра өрбіткен, оның дамуына бар қажыр-қайратын жұмсаған ақын болды.

Ақыт ақын болумен бірге Қытайдағы қазақтардан тұңғыш мектеп ашып, бала оқытқан ұлағатты ұстаз, ғұлама ағартушы. Ол 40 жылға жуық бала оқыту қызметімен шұғылданып, Ыбырай Алтынсарин секілді өлең мен ағартушылықты қатар алып жүрген. Осыған сәйкес ағарту идеясы көп өлеңдерінде басым орын алады.

Өз ұлты – қазақты қатты сынаған адамның бірі – Ақыт. Ұлы Абай да кезінде өз ұлтын көп сынап еді. “Ішім толған у мен өрт” деп қазақ үшін

қапырық жұтып, өмірден күңіреніп өтіп еді. Ақыт та Абаймен үндес болды. Ол да өз ұлтын сынай отырып, халқын оятуды, тік тұрғызуды, серпілтуді, қараңғы түнектен шығарып, еңсе көтертуді, сөйтіп, озық елдер санатына қосуды мақсат етті. Осындай өскелең мақсатпен ақын қазақтың бойындағы мінін жасырмай айтып, оны ер-азамат намысына көтере сынай келе, осы індеттерден құтылудың жолын да қарастырады. Ақыт қазақты көктетпеген дерт ретінде: надандық, өнер-білімнен құр қалған көрсоқырлық, талапсыздық, ынтасыздық, тамағы тойғанына мәз болушылық, жалқаулық, тоғышарлық, бойкүйездік, керенау-кереғарлық, есерсоқ дарақылық, даурықпалық, шаруаға қырсыздық т.б. атап көрсетеді. Ақын қазақтың осы міндерін көзге шұқып, көкейге нұқып көрсетіп, сынмен жасқап алып, ақылмен жетелеуді нысана етеді. Сондықтан ақынның бұл топтағы өлеңдері көбінесе ақыл-кеңес, үгіт-насихат түрінде келеді.

Ақыт халықты жоғарыдағыдай дерттен арылту үшін өнер-білім үйренуге, оқу-ағартуға, мәдениетке, береке-бірлікке, бір ауыздылыққа, адамгершілікке, ізгілікке шақырады. Тер төгіп еңбектенуге, өте-мөте отырықтанып, егін салуға үндейді.

Ақыттың 30 жылдардан бұрынғы өлеңдерінде көбінесе діни-ағартушылық ағымның белгілері анық байқалса, кейінгі туындыларында ақынның азаматтық биікке көтерілгені айқын аңғарылады.

Қазақтың демократ ақын-жазушылары секілді Ақыт та, ғылым-өнер арқылы ұлтты құтқаруға болады деп ұғынды. Ұлттың еркіндікке, мәдени және саяси жақтан теңдікке жетуінің негізі – ғылым, өнер деп есептеді. Өркениетті, озық өредегі ұлттарға теңесудің кілті – оқу-ағартуды жаппай жалпыластыру деп ұққан ақын өлеңін де, өмірін де ағартуға арнап, озық елді үлгі ете отырып, халықты жаппай біліммен қарулану керектігін жатпай-тұрмай насихаттайды.

Тат бастырмай жүректі,  
Өткір қылып қайраңдар.  
Өнер-ғылым үйреніп,  
Бұлбұл құстай сайраңдар.  
Бала оқытып мектеп сап,  
Ағартып елді жайнаңдар!–

деген ізгі тілегін білдіреді.

Ғылым сәуле нұр жарық,  
Оқымай болмас құр жарық.  
Тырманьп ғылым оқысаң,  
Жүрегіңе тоқысаң,  
Көресің сонда бір жарық.

Оқысаң, тоқысаң ғана – көзің ашылады десе: “Байлық” деп тек мал жинаумен күн өткізіп, өзге елдің көшіне ілесе алмай, мәдениеттен кенже қалған елінің күйкі тірлігіне күйінеді.

Зауыт жоқ, қазына жоқ мал сақтаған,  
Мал бағып бай дегені салпақтаған.  
Аспан, су, жер астымен жүрді бәрі,

Жатырсың әлі ұйқыда жалпақ табан.

“Бытырап тау мен тасты көше бермей”, заман талабына сай егін егіп, отырықтасуды ұсынады.

Ақынның елді мәдениетке, еңбекшілдікке, талаптылыққа, береке-бірлікке, адамгершілікке шақыруы да оның ағарту идеясымен астасып жатады.

Өнер-ғылым үйреніп,  
Алыстан істі көзделік.  
Қыдырып шай мен ет іздеп,  
Ауылдан-ауыл кезбелік.  
Баттасып бекер жатқанша,  
Жұрт болайық өзгеріп.  
Еңбексіз жұрт емініп,  
Әркімге көз сүзбелік.  
Бір қазақтан басқаның,  
Бәрі жатыр өзгеріп.

Ақыт еңбексіз, “терін сатпай, телміріп көзін сатып”, бекер күн өткізуге қарсы, ондайды санасыздық санатына жатқызады. Басқа халықтың тұрмыс-тіршілік, іс-әрекетіне қарап ойлануға шақырады. “Еңбек – бәрін де жеңбек” демекші, халық өнер-біліммен қаруланып, “іс іздеп, еңбек қылып, талап ойласа” бәріне де қол жеткізе алады деп есептейді.

Бұл орайда Таңжарық Жолдыұлы да (1903–1947) нақты ұсыныстар жасап, елді өркениетке жеткізетін жолды нұсқайды, халықты оятуға деген талпынысын күшейте түседі.

Өнерлі елден өнеге ап,  
Олардан еш қалыспа.  
Аспандата шарықта,  
Балапан құстай қалықта,—

деп ұлтының, халқының санасына жігер отын тамызуға тырысады.

Мектеп ашып бала оқыт,  
Үйренуден жалықпа.  
Өсек айтып, өрт қойып,  
Бір-біріңмен алыспа,—

деп, ел болашағын, ұрпақ қамын ойлауға, олардың өркениет дамуынан қалып қалмау үшін мектеп ашып, біліммен қаруландыруға, дүниеге көзін ашып, ой-санасын оятуға шақырады. Жаман әдеттен арылуға, бірін-бірі бағалап, ынтымақты болуға үндейді. Жаман әдет, надан түсініктің бір парасы “мансап десе шапқылап, пара беріп пұл шашу” екенін ашына айтып, оның орнына еңбек ет, мағыналы тірлік істеп, артыңа өнегелі іс қалдыр деп тілек білдіреді.

Қала салып, ағаш ек,  
Қалсын атың тарихта.  
Еңбек істеп, пұл жиып,  
Ақ-қараны парықта.  
Жаман істен аулақ бол,  
Бетің салмай салыққа.

Астық айдат, мал өсір,  
Көрінгенге көз сатпа.  
Ал, қазағым, тез аттан,  
Бойыңа сеніп тек жатпа,—

деп, Ақыт өлеңдеріндегі ағартушылық идеяны одан әрі дамыта түседі, жаңа мазмұнмен толықтырып, жетілдіреді.

Ал “Оқы, жастар, қалам ал!” деген өлеңінде Таңжарық жастарға тікелей бағыттап ой тастайды, оқуға, ғылым-білімге жаппай бет бұру керектігін, енді кешігуге болмайтынын бар ықыласымен ескертеді.

Оқы, жастар, қалам ал!  
Талпынар күнің туылды.  
Біліммен шыққан даналар,  
Босатпай оқы буынды...—

дей келіп,

Көрсеткен дүние кеңдікті,  
Әперетін теңдікті,  
Нығайтатын елдікті,  
Жасасын ғылым, жасасын!—

деп, шабыттана бар дауысымен ұрандайды. Ел болашағы, теңдікке жету жолы, дүние сырын білу негізі тек қана білім мен ғылымды игеруде жатқанын ағартуды көздейді.

Сөйтіп, Ақыт ақыннан бастау алған діни ағартушылық идея кейінгі Таңжарық және басқа ақындарда демократтық көзқараспен жалғасады.

Ағартушылық идеяны өзінше дамытқан, халықтың санасын оятуға белсенді де өшпес үлес қосқан өз дәуірінің озық ойлы, өрелі ақындарының бірі – Шылбы Көмекұлы да (1860–1936) өз тұсында оқу-ағарту арқылы халқының білімін көтеру керек болып отырғандығын сезініп, өзі қаладан ауылға барып өз қаражатымен медресе, мектеп салдырып, оқу-ағартумен айналысады. Сондай-ақ ол өзі ел аралап жүріп, халықты балаларын медресе, мешіттерге беріп оқытуды насихаттайды.

Шылбы өлеңдерінде де көбінесе ағартушылық идея, ақылиялық сарын басым болып, ақыл-кеңес, өмірдің қорытындысы арқау етіледі. Өмірдегі белең алып отырған келеңсіздіктерге күйінген ақын жан айқайын білдіріп мұңын шағады.

Ел үшін дүниеде тыным тұрмай,  
Наданға әуре болдым ұқтыра алмай.  
О, шіркін, жүрегіме бір дерт болды,  
Болысқа кегім кетті күш қыла алмай.

Көкірегінде сәулесі жоқ жандарға сөзін ұқтыра алмаған, жоғары жікке күш қыла алмаған кейбір сәтіне ашынып, қабырғасы қайысқан, елі үшін еміренген ақынның бұл өлеңі “Мыңмен жалғыз алысқан” ұлы Абайдың “Қайран сөзім қор болды, Тобықтының езіне” деген сөзін еске түсіреді.

Кемеңгер Абайша толғанған ақын халқының тамағы тойғанына мәз болып тырп етпей ұйқыда жатқанына жаны түршігеді.  
Тамағың тойғанына масаттанып,

Өттің ғой сорлы қазақ ұйқы басып, [1, 57 б.].

Ақын мұнда: “Тамағы тоқтық, жұмысы жоқтық, Аздырар адам баласын”, – деп дана Абай айтқандай характер қылмай, ойсыз, күйсіз жата берсе, надандық жайлап, өзге елдің шаңына да ілесе алмай, бәрінен құралақан калып, өмірі өксумен өте береді. Сондықтан өзге дүниеге көз тігіп, серпілу, еңбек ету, өнер-ғылым иелеу сонда ғана озық елдер санатына жете алады деп түйіндейді.

Талап қыл өнерсізде үйрен кәсіп,  
Өнерлі халықтармен араласып.  
...Жаратқан дүниені нағыз еңбек,  
Ол өзі байланысты ғылымменен [2, 236 б.]–

дейді. Сонау меңіреу заманда тұрып, ақын бүгінгі дәуірдің өресімен тыныстас ой тастайды. Әлеуметтік, экономикалық және білім мен мәдениет жағынан артта қалған қараңғы халықтың көзін тек ғылым өнер арқылы ғана ашуға болады деп пайымдаған ақын өзінің үлгілі ісімен де, жырымен де халықты білім иелеуге, оянуға, бас көтеруге насихаттайды.

Қытайдағы қазақ поэзиясындағы ағартушылық идеяның дамуында, жүзеге асуында ірі тұлға, өзіндік ақындық болмыс-бітімі айқын, шығармашылықта өзіндік өрнек-бояуы, өзіндік үні бар талантты ақындардың бірі – Шарғын Әлғазыұлы 1903 жылы бүгінгі Алматы облысының Ұйғыр ауданындағы Тиірмен деген жерде туған. 30 жылдары асыра сілтеудің әпербақандары салған лаңның салдарынан босқын болған елмен бірге Шарғын ақын Қытай асып кетеді. Келген бойда Іленің Текес ауданына кеп тұрақтайды.

Бұл кездері Іле өңірін ежелден мекендеп келе жатқан тұрғылықты халықтар да қараңғылықтың, зорлық-зомбылықтың құрсауында сансырап жатқан-ды. Сол елдің қамын ойлап, жарғақ құлақтары жастыққа тимей жүрген ағартушы Дәулеткелді мен ақын Таңжарық секілді ардақты азаматтармен ұшырасуы Шарғынның ойына өріс, жырына шабыт беріп, жігерін қайрайды. Солармен бірге оқу-ағарту ісін ұйымдастыруға құлшына кіріседі. Өзі мекен тұтып тұрған Үйсін тауының бөктеріндегі қазақ ауылдарында алғаш мектеп ашып, бала жинап оқыту шараларын жүзеге асырады. Біраз жылдан соң, Шарғын Текес ауданының оқу-ағарту ісін басқаруға жұмысқа тағайындалады. Бұл қызметті бірнеше жыл істеп, Тәңір тауының баурайындағы қазақтардың ұрпағын өнер-білімге баулиды. Игі тәрбие береді. Ағарту ісіне педагогтік-ұстаздық еңбегімен үлес қосумен бірге өзінің жыр жасампаздығымен де барынша ат салысады.

Тұратын бір қалыпта нәрсе бар ма,  
Кейде ысып, кейде жүрек салқындарсың.  
Ұмтылып мәдениетке қол созыңдар,  
Бұрынғы ескіліктің салты қалсын...  
Өткенде оқымаған адамдар көп,  
Зорлаған көне қоғам қарғыс атсын.  
Өнер-білім, оқусыз бекер қалсаң,  
Ойланшы, қанша нәрсе жапырасың [3, 58 б.].

Ғылымсыз жұрт қатарға қосылмайды,  
Қол соз, ұрпақ, ғылымға тіл алғаның.  
Исі қазақ ұлтына мың бір сәлем,  
Жалғыз-ақ міндеті емес бір адамның,—

деген шумақтар ұлы мақсаттар жолындағы дауылпаз ақынның шынайы жүрек сөзі еді.

Шынжаңдағы қазақтар арасынан шыққан аса дарынды ақын Таңжарықпен қатарласа жүріп, қазақ әдебиетінің өрістеуіне, дамуына елеулі үлес қосады. Бұл тұстағы шығармаларында екі ақын да қазақ халқын оянып, өнер-білімге құлаш ұруға, береке-бірлігін нығайтуға үндейді. Намысын қоздырып, табанды әрекет жасауға жігерлендіреді. Таңжарық:

Тағысы болып алдың таудың, қазақ,  
Жая мен дәмін татып жалдың, қазақ.  
Құзғындай құзар шатқа ұялаған,  
Әр сайға бірден қора салдың, қазақ.  
Өстіп-ақ жабайы боп өтемісің,  
Ішінде қарағай мен талдың, қазақ?  
Көзіңді айналаңа бір салсаңшы,  
Табасы бола бермей жанның, қазақ.  
Жатырсың надандықтан өрт ішінде,  
Басыңды көтермесең жандың, қазақ,—

десе, осы мұратты Шарғын да ту қып көтереді:

Білімге өнерменен серме құлаш,  
“Алма піс, аузыма түс” деме, қазақ.  
“Ынтымақ – ырыс алды” деген сөз шын,  
Бірін жау, бірін жат көрме, қазақ.  
Ел болып есеюдің қамын ойла,  
Жат жауға намысыңды берме, қазақ!

Шарғын ақынның көзін көріп, сөзін естіген, өлең-жырларынан сусындап, тағылым алып өскен інісі, белгілі жазушы Құрманбай Толыбаевтың қос дарын туралы: “Бұл екі ақынның бала кездерінен өнеге алған, ұстаз тұтқан Абай Құнанбаев, Ахмет Байтұрсынов, Міржақып Дулатов, Мағжан Жұмабаев сынды қазақ ойшылдары салған ақ жолдың, ізгі тілектің үзілмей жалғасқан сарыны еді. Жас ақындар қазақ халқының болашағы үшін толғана ой кешіп, өз түйсіктерін ортаға ашық жаяды. Сөйтіп, Шынжаң қазақтары тарихында ағартушылық бағыттағы әдеби ойдың өрістеуіне ақыл-парасаттарын жұмсайды. Сонысы үшін де ел Таңжарық пен Шарғынды егіз қозыдай көріп қошаметтейді, өлеңдерін оқып, ойларынан нәр алады. Ойлы өлеңдері мен аңғарлы толғаныстары туған халқының жүрегінен жол табады” [4],— деп жазғанындай Шарғын ақын өзінің бар ғұмырын ағартушылық жолға арнаса, шығармашылық бағытын да сол ағартушылық идеяға жұмсады.

Әдеби үрдіске өзіндік үлес қосқан, азат ойдың жаршысы, ақындық ортаның тағы бір көрнекті өкілі – Досбер Сауырықұлы (1894–1971) да соңғы ұрпаққа үлгі боларлық көптеген ақыл-кеңестер айтады. “Қалам мен балаға”

атты толғауында ақын жастарға өнер-білімге ұмтылу, талапкер, үміткер болу, жақсыдан үйреніп, жаманнан жирену, ойламды-толғамды, шыншыл да адал, кішіпейіл, еңбекқор болу сынды толып жатқан жақсы қасиеттерді дәріптейді.

Қазына таусылмайтын – ғылым-білім,  
Сенім жоқ мал байлығы – баққа, балам.  
Білімсіз билік айтып тұра алмайсың,  
Мінсең де патша болып таққа, балам.

Адамның бағының жануы мал мен байлыққа емес, қайта ғылымға байланысты деп, ғылым-білімнің рөлін аса жоғары бағалайды.

Ақын еңбек, еңбеккерлік, талаптылықты да айрықша ауызға алады. Барлық байлық пен бақытқа жетудің кілті осы еңбекте деп түйеді.

Талапты нұр жауады ерге, балам,  
Еңбектенсең шығасың белге, балам.  
Қолыңды еш нәрсеге жеткізбейтін  
Соңынан еріншектің ерме, балам...  
Бір парыз еңбек ету ер жігітке,  
Сүйрейді еңбек ерді өрге, балам...  
Ер жігіттің дәулетті талабы еңбек,  
Еңбекке бақыт пен дос келмек, балам.

Талаптанып, ерінбей еңбектенсең, алға қойған мақсатыңа, мұратыңа қол жеткізе аласың, еріншек ез болсаң өмірден құр алақан қаласың, яғни, “жатқанға жан жуымайды” деген пікірін ортаға салады.

Әдебиет тарихын қоғам дамуының жанды көрінісін елестетер жәдігер деуге болады. Тарих тарихи оқиғаларға, кезеңдерге, дәуірлерге хронологиялық тәртіппен сипаттама беретін болса, әдебиет сол құбылыстарға замана биігінен баға береді, жалпылық сипат, оның ішкі өмірін бейнелеу, даралау мен жалшылау арқылы белгілі кезеңнің көркем образын қалыптастырады.

XX ғасырдың алғашқы жартысында Қытай елінің ескі басқару жүйесіне сәйкес әділетсіз өкімет пен олардың итаршылары жергілікті әкім қаралар тарапынан болған екі жақты езгінің қыспағында қалған ел әбден күйзелді. Ел басқару ісінде әділетсіздік көбейді, ұлықтардың, олардың ел ішіндегі өкілдерінің пиғылдары бұзылды, жемқорлық, парақорлық өршіді. Ежелден келе жатқан ел бірлігі ыдырауға, халық имандылықтан ажырауға айнала бастады. Бұл құбылыстың бәрі де сол кездегі көзі ашық, көңілі ояу, зерделі азаматтардың жанын толқытып, жүрегін сыздатты. Әсіресе бұрыннан да елдің күйкі тірлігіне күйзеліп, мешеу тұрмысына қамығып, туған халқын өркениет аясына кіргізудің қамын ойлаған, ол үшін ғылым, білімнің мәнін түсіндіріп, ағартушылық бағытты ұстанған ақындар тағы да алғашқы болып заман күйін жырлай бастады. Бірде бір кездегі Дулат, Шортанбайлар тәрізді бүлінген елдің болмысын, ел сенген “жақсылардың” қорқау кейпін толғаса, бірде Ыбырайша мектеп ашып ұрпақтарды сауаттандырып, санасын оятуға ұмтылды. Абайша толғап арлы іс қылуға, ғылым, білімді меңгеруге шақырды, енді бірде Ахмет Байтұрсынов бастаған алаш ұранды әдебиет ықпалында үн көтеру үрдісін жүзеге асырды.

Бұл орайда да жоғарыда айтқанымыздай тағы да Ақыт, Шылбы, Асылхан, Көдек, Шарғын, Досбер болып, орталық тұлға ретіндегі Таңжарық қатарлы ақындар халық сөзін айтып, ел өмірінің жанды суретін өз өлеңдерінде бейнелеп берді. Бұлар қоғамның, әлемнің даму бағыттарын бағамдап қана қалмай, қоғамдық ой-санаға әсер етті. Өздерінің ұстанған бағыттарын адамдардың рухани жаңаруына пайдалануды, заманның қатқан қатігез заңдарына әсер етуді, іргелі елдердің қатарына қосылу үшін надандықтан арылып, білімге, ғылымға ұмтылуды насихаттайды. Өз замандарының қалыптасқан ортасынан оза туып, ұлттық элитаға айналды, қоғамның қозғаушы күші болды. Отарлық саясатты жақсы түсінді, елдің дінін, тілін жою мақсаттар қойылғанын білді. Олардың өлеңдерінде әлеуметтік сарын бұрынғыға қарағанда молая түсіп, жан-жақты көрініс тапты. Көдек Маралбайұлы, Асылхан Мыңжасарұлы, Досбер Сауырықұлы қатарлы ақындардың өлеңдерінде Таңжарықтың мол әдеби мұрасындай болмаса да көркемдік, заманауилық тұрғыдан бірде-бір кем түспейтіндей деңгейде әлеуметтік сарын барынша көрінді.

Әлеуметтік сарынды айқындайтын шығармалар беру тұрғысынан келгенде, көш басында тағы да Ақыт Үлімжіұлы тұрары анық.

Жалпы Ақыт ақын өмірі елім деп “өксіп жылап”, “қара қазақтың қамын жеп” өткен өмір болды. Сондықтан ақын мұраларын жинауда, зерттеуде бірталай жылдан бері белсенді жұмыс істеп жүрген баспагер Қалиолла Нұртазаұлы: “Оның балалық дәуірін айтпағанда, бүкіл өмірі ақтық деміне дейін халық ісі, халық мұраты жолында еңбектенген өмір болды” [5, 57 б.], – деп жазады.

Бисмилладан бастайын,  
Азғана кеңес сөз басын.  
Ой түбіне көз салсам,  
Қағазға тамар көз жасым.  
Сыртым сау, ішім өліктей,  
Мүшем шықты беріктей  
Өксіп жылап өттім ғой,  
Қара қазақ қамын жеп.  
Мен де алыстым сенімен,  
Санаңа сарық еліңмен, –

деген өлең жолдарынан жанын туған халқы үшін ту етіп көтерген азамат ақынның азалы үні естіліп тұрса, енді бір жағынан Ыбырай мен Абай поэзиясының сарыны да байқалады.

Еркіндігінен айырылған елдің бұрыннан келе жатқан моральдық-этикалық нормалары мен әдет-салттарының өзгеріске ұшырап тозғындағаны ақын жанын жегідей жейді. Бұның бәрі кертартпа билік үстемдік еткен кер заманның кереғарлығы мен қайшылығынан деп таниды.

Зар заманның тұсында,  
Бай кедейді көрмейді.  
Ағайыны пақырға  
Пайдасыз сауын бермейді.

Иманды көбі білмейді,  
 Түзу жолмен жүрмейді.  
 Не десек де, жарандар,  
 Халық бұлай тозғанда  
 Тура дінге кірмейді.  
 Берекені білмейді,  
 Сенімі, ары кірлейді...  
 Заманның жайын мен айтсам  
 Патшаның кетті қуаты,  
 Бидің ылай суаты,  
 Жақсының тозды мұраты,  
 Пенденің кетті ұяты,  
 Байдан қайыр жоғалып,  
 Жат болып кетті жұраты.  
 Байдың көңілі өр болды,  
 Кедей біткен кер болды,  
 Санасы бар жақсының  
 Жүрегі толған шер болды.

Ақыт сүреңсіз заманға кектеніп, халықтың болашағынан түңіледі. Өйткені адамдардың нысабы азайып, пиғылы бұзылған. Жақсының мұраты тозып, пенденің ұяты кеткен. Көбінің иманы жоғалып, қисық жолға беттеген. Берекені ұмытқан. Сенімін, арын жоғалтқан. Байда қайыр, биде тура билік жоқ. “Санасы бар жақсының жүрегі толған шер болған”. Кертартпалық, әділетсіздік, заңсыздық күшейген. Сондықтан ақын:

Сөз жазамын аңырап,  
 Күле алмаймын жадырап.  
 Қайран елім – қазағым,  
 Сорың сенің қалың-ақ, –

деп соры қалың қазақтың қамын ойлап, жол таба алмай ширығып, қапырық жұтады. Алайда саналы да сауатты ақын үмітсіздікке, сарыуайымға салынбайды. Кейде сол азып тозған тар заманға кектене қарап, өшіге шабуыл жасайды. Көпшілікке қоғамдық дерттің себебін ұғындыруға қарманып, одан арылтудың жолын қарастырады. Халықтың санасына сілкініс жасауға ұмтылады. Ол өлең-толғауларында әлеуметтік мәселе көтерсін, мейлі басқа тақырыпта жазсын өзінің ағартушылық идеясымен сабақтастырып отырады.

Ақын Шылбы Көмеқұлы жасаған ортада да парақорлық, жемқорлық, ауыр алман-салық салдарынан жоғары үкіметке арқа сүйеген жергілікті парақор мәнсаптылар мен күн қақты қарашалар ортасында үнемі қайшылық-қақтығыстар туылып тұратын. Мұндайда ақын халық жағында болып, олардың мұңын мұндап, сөзін сөйлейтін, туын көтеретін. Жергілікті әкімдердің әділетсіздігін, сұрқиялығын, ашкөздігін айыптап, поэзиялық уытты тілімен түйрейтін.

Орталықтағы шенділер мен жергілікті болыстарды қойға шапқан, жылмаңдап жемтік іздеген қорқау қасқыр мен итке теңейді.

Қасқыр келіп жемекке қойға шабар,

Қотан ит те қасқырмен бірге талар.  
Қасқырменен бірлесіп қойды жесіп,  
Ертең бірдей сақ ит боп қала берер.  
...Мұртын майлап, жылмандап, жемтік іздеп,  
Қорқау қасқыр, қотан ит, эне, солар [6, 110].

Әлеуметтік кекесін, мысқыл басым осы жолдарда момын шаруаны тонаған озбырлардың сиқын ащы, уытты тілмен әжуалайды.

Ауылдағы атқа мінерлер мәнсап алар шағында Күре ұлығына қолда барын аямай пара беріп жағынатын. Жоғары өкімет те оларды бір-бірімен бәсекелестіру, қырқыстыру арқылы өз мақсаттарына жетіп отыратын.

Әр руға бір-бір болыс сайлап алды,  
Гоминданға көп пұлымен пайда қалды.  
...Мәнсап талас, жер талас анық кірді,  
Өтірікке шындай болып нанып кірді.  
Бір пайда бір жағынан шыға ма деп,  
Араға шын бүлікті салып кірді [7, 13 б.],—

деп, ащы шындықты ақын жасырмай айтады.

Өзінің қоғамдық қимылымен де, жалынды жырымен де қараңғы халқының көкірегіне нұр құйған, екі дүниенің сипатын қатар танып өскен ақын Шарғын Әлғазыұлы да жиын-топтарда, дабыралы бас қосуларда айтысқа түсіп, халықтың мұңын шағып, олардың сүренсіз ауыр халын, және зұлымдық пен жауыздыққа қарсы ашу-ызасын ашық айта бастайды. Бұл тұстарда, яғни 1939-1940 жылдары Гоминданның Шыңжаңдағы қанішер халықтың ішінен шыққан көзі ашық, көкірегі ояу, халықшыл зиялы қауым өкілдерін жалған жаламен тұтқындап, басына қатер төндіреді. Бұл алапат әктері екі бастан белгілі жағдай болатын. Сонымен Құлжада газет шығарып жүрген Таңжарық Үрімжі түрмесіне айдалса, Шарғын да талай қысымшылыққа ұшырайды. Алайда олар тар қапаста отырып та, ел басына төнген қасіреттің қара тұманын, “Түрмедегі халді” жыр арқауы етті. Таңжарық “Түрме халы” атты толғауында:

...Шәуешектен Қанағат, Әлімғазы,  
Нұртаза, Қазез кетті келер жазы.  
Алтайдан Шақан, Мәңкей, Ақыт қажы,  
Бұқатбейсі, Зия мен Халелтайжы...  
Үрімжіден кетті Әбеу Тиңжан, Жүніс,  
Қожанияз, Баймолла бәрі бір іс.  
Жүніс қажы, Сатарқан, Мұқаш пенен  
Қош айтысып дүниеге – бітті жұмыс,—

деп зұлмат заманның мезгілсіз құрбаны болған, қинауда өлген, із-тозсыз дүниемен қоштасқан, халқының еркіндік теңдігін аңсаған есіл ерлерді елжірей еске алса, осыған сәйкес Шарғын да:

Текестен Әжі менен Халық кетті,  
Қосақтап екі арысты алып кетті.

Жалынды Ахметжандай қайран жастың,  
Бір түнде ішек-қарнын жарып кетті.  
Бермесе, құдай түбін кім біледі,  
Балаға ата-ананы зар ғып кетті.  
Үйінде азаматтар жүре алмастан,  
Әр жерге жан сауғалап қаңғып кетті.  
Түріне бұл жалғанның қара жұртым,  
Ессіз ғып, елдің көңілін дал ғып кетті.  
Ағартып бір-ақ жылда сақал-шашын,  
Жігітті отызында шал ғып кетті.  
Күйікпен ата-анасын тұралатып,  
Тұра алмас төсегінен сал ғып кетті [8],—

деп сол тұстағы Шың Шысай диктатурасының қанды қырғынын айқын бейнелейді.

Әлеуметтік мәселені көбірек қозғаған өлеңдер жазған ақынның бірі— Көдек Маралбайұлы қандай тақырыпқа келсе де баяғы өзінің шыншылдығынан таймаған. Өктемдік пен келеңсіздікке кектеніп, оны сынаған, елім деп еңіреген тұстары көп. “Көзден жас, көңілден шер кетпеген” елдің күйі мен жан азабын жете түсініп, заман мінезін айыптауды басты нысанаға айналдырған. “Албан тарихы” деген толғауда:

Қазіргі патшаның заманының,  
Тоғайдай өртең шалған әрі кеткен.  
Ордалы жыландай боп шағып отыр,  
Халыққа қысымы мен зәбірі өткен...  
Қараған патшаға елді көрсен,  
Тоғайдай өртең шалған әрі кеткен.  
Қыршаңқы қызыл шұнақ ат сияқты,  
Сымпиып құйрығы мен жалы кеткен,—

деп “халыққа қысымы мен зәбірі өткен” патшалық Ресейдің отарлау саясатының қиянатын танып, еңсесі түскен қалың қауымның ауыр халін дәл бейнелесе, ақындық биігі мен азаматтық болмысын танытар ұлағатты туындысы “16 жыл туралы” дастанында:

Ақ патша әділеттен тайғаннан соң,  
Соғысқа бала бер деп қылды пәрман.  
Өлсек те бұған бала бермелі деп,  
Қырылды Қарақолда өңшең бағлан.  
Басшыдан ақыл табар айырылған соң,  
Сандалып, Бұқарадан кетті дәрман...,—

деп әділетсіз өкіметтің қысымынан босқын болып ауа көшкен елдің тартқан тауқыметі мен шеккен азабын етжүрегі езіле отырып толғайды.

Бұл кез зерттеуші Д. Мәсімханұлының сөзімен айтсақ: “Қытайға барған “қашқын-босқынды” былай қойып, ондағы жергілікті ағайындардың да жетісіп отырмағаны белгілі болатын. Яғни, ол кез Қытайдың жергілікті шенеуніктері мен олардың қазақ қолшоқпарлары халықты қанау мен отаршылдық езгіні ең бір асқындырып тұрған кезі еді” [9]. Сол бір нәубет

жылдардағы халықтың басына қара бұлт үйіріліп, күйзелісті күй кешіп отырған жадағай тұрмысын ақын “Кең Текес” атты толғауында:

Меншікті жер мен судың иесі бар,  
Кедей мен кембағалға жер жетпеген.  
Қысы-жаз, күндіз-түні тыным алмай,  
Өмірі барады өтіп бейнетпенен...

Күйі ауған нашар байғұс толып жатыр,  
Кетіпті есеңгіреп шығынменен.

Күн қақты қарашалар көп-ақ екен,  
Жылқының жауырындай шыбын жеген,—

деп мейлінше шынайы суреттейді.

Ауған елдің ауыр тұрмысын козімен көріп, өзі де басынан кешірген ақынның жаны жай таппай күйзеледі. Алайда талай құқайды басынан өткерген аңғарлы ақынның пайымдауынша, кер заманның кереғарлығы мен зұлымдығына, илігіп, “шықпа жаным шықпамен” тіршілік етіп жата берсе, бодандықтың мәңгілік құлы болып, өмірі оқсумен өте береді. Сондықтан:

“Онайлықша бұл азап арылмайды,

Нөсер бұршақ алмаса сел бол келген”,—

дейді. Тек етек-жеңін жинап серпілгенде, бел шешіп, білек сыбанып бас көтергенде ғана азапты өмірден арылып, еркіндік, теңдікке қолы жететіндігін айтып, жатпай-тұрмай насихаттайды.

Өзінің қысқа ғана ғұмырында отты жырлармен артына өшпес мұра қалдырған, жас талант, арынды ақын — Асылқан Мыңжасарұлы да (1893-1918) өз дәуірінің шындығын бейнелеуде, әлеуметтік мәселелерді көтеруде белсенділік танытты. Ақын жасаған дәуірде қазақ шонжарлары мәнсап алар шағында сол тұстағы Іленің билік органы тұрған Күреге (қазіргі Қорғас ауданында) барып, ондағы ұлықтарға пара беріп жағынатын. Күредегі ұлықтар да кім құлқынына көбірек құйса, алтын, күміс, жамбыны кім көп берсе, соған мәнсап беретін. Асылқан Әділқайыр болысқа ілесіп Күреге барғанда, Күре ұлығының осы әділетсіздігін көріп:

Күреде съезд ашып кеңес құрдың,

Жиып ап би-болысты егестірдің.

Жамбыны көп бергенге мәнсап бердің,

Ұлық-ау, тура билік емес мұның!—

деп айыбын бетіне басып, өлең шығарады. Бұл өлең құлағына жеткен ұлық барынша уыттанып айтыста жеңіп, болыстық алған Әділқайырды да. Асылқанды да қастандықпен мезгілсіз мерт қылады.

Ақынның “Нұрипамен айтысында” бір дәуірдің өмір шындығын дәлме-дәл етіп көркем тілмен бейнелейді. Айтысқа түскен әріптестер көріністе бірін-бірі мінеп, кемсітіп отырғандай, мұның өзі рулар арасындағы қақтығыстай болып көрінгенімен, айтыстың астары ел ішіндегі ақалақшы, мампаң, би-болыстардың, зәңгі-төрелердің кемістігін бетіне басып, олардың жексұрын, жиренішті қылықтарын шенеп, әшкерлеп отырады. Мысалы,

Баласы Сыламжанның мампаң шаңдыр,

Ұйқыдан көзін ашса, елін аңдыр.

Атаның аруағымен ол да кісі,  
Туар ма мұндай жаман тәңір алғыр.  
...Кенедей қанға тойған Дәуіт залым,  
Құртты ғой Тілеукенің тегіс бәрін.  
Шығыны осы күнде шашынан көп,  
Құтылмас қыз бермесе бірер жарым...

Осы айтыста сол кездегі ру басыларының отыз шақтысының аты аталып, олардың түрліше жағымсыз қылықтары, озбырлықтары қатаң сыналады.

Қорытып айтқанда, жоғарыдағы ақындар шоғыры әлеуметтік құрылымға орнықты бағытпен араласып, ағартушылық идеяны, азаматтық әуенді сан-салалы сипатта өрістетті. Олардың өмірі қайшылыққа толы қақтығысты ортада өтсе де, ақындық өнерімен де, қоғамдық қимылдарымен де өмірге терең араласып, сол тұстағы қоғамдық құбылыстардың қыры мен сырын, сипатын, терең, жете аңғара білді. Әрі оны өздерінің шоқтай жайнаған жырларында айна-қатесіз бейнеледі. Әділетсіздік, жемқорлық, парақорлық, мәнсапқұмарлық, көрсоқырлық, надандықты, өнер-білімнен құралақан қалушылықты, тоғышарлықты аяусыз әшкереледі. Өз халқының қамын жырлап, қасірет-қайғысына ортақтасты. Әділдікті жақтады, аңсады. Іргелі елдердің қатарына қосылу үшін надандықтан арылып, білімге, ғылымға ұмтылуды насихаттады. Мектеп ашып ұрпақтарды сауаттандырып, санасын оятуға ұмтылды. Ғылым, білімнің мәнін түсіндіріп, арлы іс қылуға, замана ағымына үйлесуге шақырды. Қоғамның тарихи астарын, халықтың әлеуметтік, саяси-шаруашылық күйі мен салт-санасын, сахара табиғатын айқын суреттеді. Сөйтіп, олар азаматтық поэзиясымен, күрескерлік рухымен Қытайдағы қазақ әдебиетінің қалыптасып, дамуына және ондағы халықтың ой-санасын оятуға, өсіруге, әдеби үрдістің ілгерілеуіне елеулі үлес қосты.

#### Пайдаланған материалдар:

1. Ақыт Үлімжіұлы. Шығармалары.– Үрімжі: Шынжаң халық баспасы, 1994.–1-том.– 689 б.
2. Таңжарық. Шығармалары.– Үрімжі: Шынжаң халық баспасы, 2001.– 1148 б.
3. Досбер Сауырықұлы. Шығармалары.– Күйтің: Іле халық баспасы. 2000.– 135 б.
4. Көдек. Шығармалары.– Үрімжі: Шынжаң жастар-өрендер баспасы, 1988.– 142 б.
5. Шөкеманұлы М. Асылқан Мыңжасарұлының өмірі мен өлеңдері туралы // Шынжаң қоғамдық ғылымы.– 1993.– № 4.

#### Сілтемелер:

- ① Ырыскелдиев Т. Шылбы Көмекұлы және оның шығармалары жөнінде // Шалғын. – Үрімжі, 1983.– № 1.
- ② Әдебиет оқулығы (10-класс).– Үрімжі: Шынжаң оқу-ағарту баспасы, 1983.
- ③ Шарғын өлеңдерінен // Мұра.– Үрімжі, 2000.– № 4.
- ④ Толыбаев Қ. Шарғын ақын // Егемен Қазақстан.– 1994.– 23 желтоқсан.
- ⑤ Нұртазаұлы Қ. Ақыт жайлы алғашқы ізденістер // Шынжаң қоғамдық ғылымы.– 1993. – № 2.
- ⑥ Шылбыұлы Д. Әкем Шылбы жөнінде // Іле тарихи материалдары.– Құлжа, 1988.– 4-к.

- ⑦ Өлең-жырлар.– Құлжа: Іле газеті баспа заводы, 1990. – 198 б.  
⑧ Шарғын өлеңдері // Егемен Қазақстан.– 1994.– 23 желтоқсан.  
⑨ Мәсімқан Д. Әсет өлді, ал Көдек неден өлді? // Қазақ әдебиеті.– 2000.–  
21 қаңтар.

### **Резюме**

В этой статье рассматривается поэтическое творчество казахских поэтов КНР.

### **Resume**

In this article author consider poetical creative kazakh's poet in China.

### **Özet**

Bu makalede Çin şairlerin yarattığı eserleri hakkında söze yer ayrılmaktadır.

\*\*\*\*\*

Адамға ең бірінші білім емес, тәрбие беру керек, тәрбиесіз берілген білім адамзаттың қас жауы, ол келешекте оның өміріне зиян әкеледі.

\*\*\*\*\*

**әл-Фараби**